

Sedue ey maso ey

Sedue namon nebut **pen-klewon** go.

Sedue meno lo nemot andua no gemang pupu:

“Genam go duot nevo lo dedam go.

genam kay so tetebok.

Nebo, genam suali so kap.

Nggeasui go wadi go mot lo yatrang se tebok.

Imotnamon wadi go duen ba lo mea srek-menayon.”

Ku kiklik, nemot andua meno banim no gemang klong.

Bala ba no pung go, koy so pupuit.

Maso sedue nggenemot no keng go gemang **kun-won**.

Sedue ngge lo duing go: ngge genam go andua nemot gabe.

Nggano maso lo sedue no ngge kalik so gemang **usi-ton**:

“Andua, mot banim no ba weng?

Genam kabung usu no klong goso **bung-tebatu**.

Kabung usu sik sogo pung gono,

mesip so gabe **kun-tu**.”

Sedue ngge lo duing go: ngge seni so.

Maso nggenemot sedue. Ngge andua kalik seni.

Sedue nggenemot lo duing go:

Ngge genam go andua seni-seni solo gabe keng go weng.

Nemot-a maso.

Sedue nggenemot koy puit go,

wep so **duik-ton**.

Wep nggenemot dedasing,

kayseguong sesengat **dam-kleton**.

Nggano maso lo ngge kalik so gemang **pu-ton**:

“Andua, wep sogo so ngge temoy kalik so duik-to?

Wep kangok go koy-a nemot no kekeblet, wadi dam genang so.

Nggano maso lo pu go,

“A andua, mot lo klong, tebok-nalo.

Nggeasui go mot lo tebok go kua goso,

wadi nesip go genam lo mea tebok-nalu.”

Ngge kalik so **semu-kleton**:

Sedue lo klong go gemang **tebok-nawon**.

Sedue duot tebok so se **ton**,

maso kateba kap go,

nebo kalik so lemoy go,

duot blo no klak go,

duot so **dam-ton**.

Sedue weng go,

duot mit no pung go,

kama tui-won go,

E, nebo-a duot so ba dedam!

Nggano sedue lo maso ngge, nemot lo ple lo but-won go.

Tengang sebui maso nemot so but go,

tandali sok go, kenong.

Sedue ngge wet-ton,

nemot go sebui ikum go:

a, sebui nogo kin kua!

Sedue ngge nemot kua senong: ngge maso.

No, nemot lo duing go:

Ngge nebo seni-seni so gabe.

Nggano maso nemot kap-won go,

daloboding sua tung go,

rluk go,

sebui put no wik-won gono,

kebasat glung go,

bala ba so got-ton.

Sedue duot tebok sik sogo mesip so bala ba no pung-won go,

nggano maso lo gemang usi-ton:

“Andua, mot nebo mo but-to?”

Nggano sedue lo pu go:

“Yang, nebo but- satu go se!”

Nggano maso nemot lo pu go:

“Sebui kay? Genam ya ikum go.”

“E, andua nemot lo! Ndo bu-a gono, gabe but-satu.”

Ikum go, ku rlui,

dali-tandali sebui iti go, ne ikum dali.

Ngge kalik seguong so **semu-ton**,

nggano sedue lo gemang **duing-ton**:

E, sedue nggenemot genam go andua gabe kua.

Nggenemot maso gabe.

Nggano genam nebo gabe kua but.

Ngge maso nemot gabe mo **but-satu**.

Andua nemot sogo-sogo so kua weng

No, genam nogo maso ba keng go weng.

Sedue lo nebut ngge, nemot dabui ba lo seguong lo **duing-ton**.

Nggano dia no gemang pu-won:

“A, genam ku piam go blo lo ba **klak-tu**!”

Sedue lo maso wep kangok golo **pui-won** go,

nggano sedue ey maso ey sagui **pung-kleton**.

e ... bat bu no **degut-klewon**.

Nggano maso ngge lo mot tra gono,

maso temu mata so **pung-lak-anatun** go,

sedue ngge bu ba no [ladap-won](#).

Maso nemotnang kam so [uwet-neton](#),

sedue kua [ikum-nesrewon](#).

Ku boblong,

maso nemotnang tegang,

put ba lo degut,

nemotnang naklay yam so [son-newon](#).

Sedue ngge nemu yakot so [bung-ton](#),

nemotnang yam so son gono,

sedue ngge pung go,

yakena no nemot so [kap-won](#).

Yakena no pung go,

sedue naklay deguo yam so [wet-won](#) go,

gemang [kuntun-lak](#).

Koy tegek go,

dali puit gono,

masi di ba no degut go,

di ey tetong,

koy nebleng blo no pupuit.

I go seni, sedue logo ey but go,

tegan ey tong go,

koy blo no ya betep,

nggano nemot lo gemang pu-won:

“Motnang genam namboynya koy blon kua betep.

Genam go nebut ya pen,

nggano genam koy ba nogo se puit.”

Maso ngga nemot lo nebut gemang pen-won.

Sedue nemot go andua ey duot dedam goso,

nebut mo pen go,

imot kua keng.

Wamoy sogo kua mlue,

nebo kalik so kua lemoy.

Ngganemot sogo so genam go nemu nggeasui go gabe buik.

Nggano maso-maso nemot koy lo yam kuim.